



**Nizom svečanosti obilježen 623. rođendan našeg grada
Stotinu jajačkih osnovaca na ceremoniji otvaranja EYOF-a 2019
4. Međunarodni košarkaški KUP kraljevskog grada**

U NOVU 2019. GODINU ZAJEDNO SMO UŠLI SA NAJMLAĐIM JAJAČKIM MALIŠANIMA



Pod pokroviteljstvom Općine Jajce i u organizaciji Centra za obrazovanje i druženje Jajce 2018. godinu ispratili smo sa Jajačkim mališanima, jer najveća radost je osmijeh na licima najmlađih. U želji da najmlađi stanovnici Jajca sa osmijehom isprate staru i dočekaju Novu godinu Općina Jajce podržala je inicijativu Centra za obrazovanje i druženje Jajce i pridružila

se organizovanju dočeka Nove godine za najmlađe.

Uz muziku, kreativne radionice, slatke paketiće i uz Djeda Mraza ispratili smo zajedno staru i dočekali Novu 2019. godinu na platou ispred Doma kulture.

I ovaj put poželjeli smo našim najmlađim stanovnicima sretno djetinjstvo, mnogo radosti, osmijeha i puno petica u Novoj godini.

SVI NA SNIJEG



Općina Jajce u saradnji sa Ski Centarom „Ranča“ i osnovnim i srednjim školama s područja Jajca, za sve jajačke učenike iznova je obezbijedila boravak na ovom skijalištu i uživanje u radostima na snijegu.

Tokom mjeseca januara, u vrijeme zimskog raspusta, pa svakim radnim danom, bio je obezbijeđen besplatan prijevoz do skijališta na Poljanama, besplatna dnevna karta za lift i topli napitak.

Ove godine, u saradnji sa nastavnicima i profesorima tjelesnog odgoja jajačkih osnovnih i srednjih škola, obezbijedena je i škola skijanja. Tako, svi oni koji su željeli naučiti skijati na raspolaganju su im bili učitelji skijanja, a angažovali su bili i nastavnici i profesori koji su vodili svakodnevnu brigu o djeci koja borave na skijalištu.

U želji da djeca provedu vrijeme na snijegu Općina Jajce je ovom aktivnošću učinila školarcima raspust ljepšim.

POSJETE PORODICAMA U POVODU BOŽIĆNIH PRAZNIKA

U povodu Božićnih praznika Načelnik Općine Jajce Edin Hozan i predsjedavajući Općinskog vijeća Jajce Ivo Šimunović danas su posjetili naselja Bravnice, Rika, Kamenice i Ćusine i tom prilikom porodicama koje se nalaze u teškom materijalnom stanju uz čestitku za sretan Božić uručili skromne novčane poklone. Riječ je uglavnom o starim i bolesnim građanima Jajca, onima kojima će ovaj novčani poklon bar malo uljepšati praznično slavlje.



STOTINU JAJAČKIH OSNOVACA NA CEREMONIJI OTVARANJA EYOF-A 2019

U organizaciji Općine Jajce stotinu učenika jajačkih osnovnih škola prisustvovalo je svečanom otvaranju Evropskog omladinskog olimpijskog festivala EYOF 2019. Predvođeni nastavnicima učenici osnovnih škola „Berta Kučera“, „13. rujan“, „Braća Jezerčić“ i „Jajce“ Kruščica prisustvovali su Svečanoj ceremoniji otvaranja festivala koja je održana na Olimpijskom stadionu „Asim Ferhatović Hase“, Koševo.

Ovo je najznačajniji sportski događaj nakon 14. Zimskih olimpijskih igara održanih u Sarajevu 1984. godine. Na festivalu je učestvovati 1600 mladih ljudi iz 46 zemalja Evrope koji su se predstavili kroz sedam različitih aktivnosti na nekoliko sportskih borilišta u Sarajevu i Istočnom Sarajevu.



EYOF (European Youth Olympic Festival) predstavlja najveći sportski olimpijski festival za mlade sportiste između 14 i 18 godina. Organizuje se zimski i ljetni festival svake dvije godine. EYOF je u sastavu Evropskog olimpijskog komiteta koji ima ekskluzivna prava na događaj.

Ovo je izvrsna prilika za povezivanje mladih ljudi Evrope, te širenje pozitivnih emocija i stvaranja zajedništva kroz olimpijski duh. Olimpijska baklja mira nakon 35 godina ponovo je vraćena u Sarajevo.

NIZOM SVEČANOSTI OBILJEŽEN 623. ROĐENDAN NAŠEG GRADA



Odlukom Općinskog vijeća Jajce 22. februar/veljača je Dan općine Jajce. Datum je ovo prvog pisanog pominjanja grada Jajca 1396. godine u Povelji iz dubrovačkog arhiva.

Tim povodom nizom svečanosti upriličenih u povodu obilježavanja ovog, za Jajce, značajnog datuma obilježen je 623. rođendan grada Jajca.

Svečanost obilježavanja počela je otvaranjem Izložbe likovnih radova

učenika osnovnih škola upriličene u holu Doma kulture i nastavljena Svečanim programom u kojem su učestvovali BZK „Preporod“, HKD „Napredak“, KUD „Stari grad“ Jajce, Gradski duhački orkestar/Limena glazba Jajce, JU Dječiji vrtić „Bare“, Igraonica „Emina“, Udruženje-Udruga umirovljenika-penzionera Jajce, Učenici osnovnih i srednjih škola iz Jajca, Sportski plesni centar „LDF“ Jajce i pjesnici grada.

Centralna svečanost upriličena je 22.2.2019. godine kada je održana Svečana sjednica Općinskog vijeća Jajce na kojoj su zaslužnim pojedincima i kolektivima uručena prigodna priznanja.

Svečanost obilježavanja nastavljena je 4. Međunarodnim Košarkaškim KUP-om Kraljevskog grada koji je na jednom mjestu, kroz trodnevno druženje, okupio preko 120 najtalentiranijih mladih košarkaša - dječaka rođenih 2005. godine i mlađe.

Odlukom Općinskog vijeća Jajce broj:01-01-6-3058/14 od 29.04.2014. godine (Sl. novine Općine Jajce, br:3/14) 22.februar/veljača obilježava se kao Dan općine Jajce. Članom 2. iste Odluke Dan općine Jajce je neradni dan.

Svečanom sjednicom OV obilježen Dan općine



Intoniranjem državne himne, u prisustvu vijećnika i brojnih gostiju, u Jajcu je održana Svečana sjednica Općinskog vijeća Jajce upriličena u povodu obilježavanja 22. februara/veljača Dana Općine Jajce. Datum je to prvog pisanog pominjanja grada Jajca 1396. godine u Povelji iz dubrovačkog arhiva.

Goste su prigodniom obraćanjima pozdravili Načelnik Općine Jajce Edin Hozan i Predsjedavajući Općinskog vijeća Jajce Ivo Šimunović i građanima Jajca uputili čestitku.

Na period od prvog pominjanja Jajca 1396. godine, prateći put kojim je koračalo Jajce kroz vijekove riječju i slikom podsjetio je direktor JU „Agencija za kulturno-povijesnu i prirodnu baštinu i razvoj turističkih potencijala grada Jajca“ Ante Brtan.

U ime gradova partnera grada Jajca čestitku svim Jajčanima uputio je Ivan Vukadin Načelnik Općine Tomislavgrad, općine sa kojim je Jajce Povelju o prijateljstvu potpisalo prije tri godine.

Jajčanima se na Svečanoj sjednici obratio i Počasni građanin Jajca doktor Benjamin Alfred Markin, dr. Ben, kojem je prošle godine dodijeljeno ovo veliko priznanje.

Dan općine je prilika da se nagrade najuspješniji pojedinci i kolektivi.

Odluka OV Jajce o dodjeli priznanja i Obrazloženje uz dodjeljena priznanja:

Na osnovu člana 30. Statuta Općine Jajce („Službene novine Općine Jajce“, broj: 3/08) i članka 14. Odluke o priznanjima i nagradama Općine Jajce („Službene novine Općine Jajce“, broj: 5/15) Općinsko vijeće Jajce na 10. redovnoj sjednici održanoj dana 28.01.2019. godine, donijelo je

O D L U K U

o dodjeli javnih priznanja i nagrada

I

Općinsko vijeće Jajce dodjeljuje javna priznanja i nagrade sukladno Odluci o priznanjima i nagradama Općine Jajce („Službene novine Općine Jajce“, broj: 5/15).

II

Počasni građanin Općine Jajce dodjeljuje se posthumno:

1. *Vojislav Vujo Vujanović,*

Plaketa Općine Jajce dodjeljuje se posthumno:

1. *Sulejman Redžić*

2. *Pejo Gavrić*

Zahvalnica Općine Jajce dodjeljuje se posthumno:

1. *Nijaz Duranović*

2. *Midhat Karadžić*

III

Javna priznanja i nagrade iz tačke II dodjelit će se na Svečanoj sjednici Općinskog vijeća Jajce u povodu obilježavanja Dana Općine Jajce 22. februara.

Članak IV

Ova Odluka stupa na snagu danom donošenja i ista će biti objavljena u „Službenim novinama Općine Jajce“.

*Broj: 01-01-6-650/19
Jajce, 28.01.2019.godine*

PREDJEDAVAJUĆI OPĆINSKOG VIJEĆA
Ivo Šimunović



PRIZNANJE: POČASNI GRAĐANIN OPĆINE JAJCE DODJELJUJE SE POSTHUMNO VOJISLAVU VOJI VUJANOVIĆU

Vojislav Vojo Vujanović, književnik, likovni i pozorišni kritičar, hroničar Pozorišnih/Kazališnih igara Bosne i Hercegovine u Jajcu, rođen je u Gredi kod Bosanske Gradiške 13.aprila 1937. godine gdje je i počelo njegovo školovanje, pa nastavljeno u Banja Luci. Studirao je u Zagrebu, Sarajevu i Beogradu. Radio je kao prosvjetni radnik, glumac, novinar. Objavio je veliki broj različitih tekstova studija, ogleđa, eseja, kritika o književnosti, teataru, likovnim umjetnostima, povijesti....objavio je 18 knjiga.

Vojislav Vojo Vujanović bio je i dobri duh Igara u Jajcu. Divan čovjek, čovjek bez kojeg su godinama Igre u Jajcu bile nezamislive. Vojo je bio najdugovječniji voditelj okruglih stolova Igara, predsjednik stručnog žirija, selektor, dobitnik Ključa grada Jajca. Čika Vojo rado je viđen gost u Jajcu i kao veliki zaljubljenik u teatar, Vojo je bio neko ko je, ne samo volio Igre u Jajcu nego je i živio s njima i za njih.

Potvrda tome su i dvije knjige koje je nama Jajčanima ostavio u naslijeđe: Plodovi i rađanja koja obrađuje 21 prijeratne igre u Jajcu i Plodovi i trajanja koja govori o 11 poslijeratnih sezona Festivala u Jajcu. Vojo je godinama vijerno sakupljao tragove, svjedočanstva, fragmente, novinske zapise, teatarske kritike, biltene i kataloge i uz vlastitu prisutnost, kao najvažniji elemenat istinskog i iskrenog oslikavanja događanja, pisao najiskrenije i najlješe priče.

Knjigu naslova Ključari grada, koja je trebala predstaviti i oslikati sve one umjetnike u čijim rukama je bio Ključ grada Jajca, kao svojevrsna nagrada, na žalost nije uspio dovršiti.

Umro je 10. januara 2018. godine u Sarajevu.

PRIZNANJE: PLAKETA OPĆINE JAJCE DODJELJUJE SE POSTHUMNO AKADEMIKU, PROF. DR. SULEJMANU REDŽIĆU

Akademik prof. dr. Sulejman Redžić zasigurno je bio jedan od najvećih i najuticajnijih jajačkih naučnika u istoriji grada. Impozantna je internacionalna naučna karijera akademika Redžića, koji je rođen i odrastao u Jajcu, završio jajačku gimnaziju i do kraja života snažno bio vezan za svoj grad.

Akademik prof.dr. Sulejman Redžić rođen je 1954. godine u Vincu, općina Jajce. Završio je studij biologije na prirodnomatematičkom fakultetu Univerziteta u Sarajevu 1977. godine, gdje je 1982. godine magistrirao, a potom 1990. doktorirao. Za dopisnog člana Akademije nauka i umjetnosti BiH izabran je 2008. godine.

Akademik Redžić dodatno obrazovanje sticao je na fakultetima širom svijeta, od Edinburga, Kembridža, preko univerziteta u Švedskoj, Italiji, Danskoj, Turskoj, Španiji, Austriji... Bio je redovni profesor i dekan Prirodno-matematičkog fakulteta Univerziteta u Sarajevu. Predavao je na mnogim fakultetima, rukovodio brojnim međunarodnim, regionalnim i lokalnim projektima. Objavio je više od 220 naučnih radova koji se i danas nalaze u mnogim svjetskim bazama podataka. Akademik Redžić osnivač je Centra za ekologiju i prirodne resurse i laboratorije za palinologiju pri Centru, prve takve u BiH. Područja naučnog interesa akademika Redžića bila su ekologija, biogeografija i zaštita životne sredine.

Pod još nerazjašnjenim okolnostima akademik prof.dr. Sulejman Redžić nas je napustio u 59. godini života januara 2013. godine.

PRIZNANJE: PLAKETA OPĆINE JAJCE DODJELJUJE SE POSTHUMNO PEJI GAVRIĆU

Pejo Gavrić bio je veliki humanista, dobročinitelj i čovjek čija vrata na kući u Bad Ischlu su bila uvijek i za svakoga otvorena. Pejo je rođen 1952. godine u mjestu Prisoje, općina Jajce gdje je završio i srednju školu. Zvanje građevinskog inženjera stiče na školovanju u Zagrebu, posao pronalazi u Dubrovniku, ali ubrzo odlazi u Austiju, otvara privatnu firmu i radi vrlo uspješno.

Volio je svoj grad, svoje sugrađane, rado dolazio u Jajce i pomagao bez obzira na vjeru i naciju. Svoju najveću veličinu je pokazao u vrijeme agresije na BiH i Hrvatsku kada se nesebično uključuje u akcije skupljanja pomoći za odbranu i pomoć stanovništvu. Svoj dom pružio je kao utočište mnogim jajčanima, organizovao je konvoje pomoći, humanitarne koncerte na kojima je skupljao novčanu pomoć i pomagao tamo gdje je trebalo. Pokojni Pejo bio je uistinu poštenjačina i veliki domoljub. Dao je veliki doprinos i u drugim oblastima: organizirao je sportske turnire, ugošćavao kulturna i folklorna društva iz BiH, zapošljavao naše ljude u svoje preduzeće. Njegova kuća u Bad Ischlu bila je kuća prolaza, ugošćavali su i pomagali prije, tokom i poslije rata. Nesebično je pomagao u liječenju mnogih osoba i njihovom smještaju. Pejo nije žalio ni truda niti vremena da obilazi udruge i udruženja šrom Austrije. Svoje Jajčane obilazio je diljem Austrije, Njemačke, Švicarske...

Pokojni Pejo Gavrić bio je utočište velikom broju izbjeglica iz naše općine, a dao je ogroman doprinos u promociji Jajca u Austriji. Teška bolest odnijela je Peju 8. marta 2013. godine.

PRIZNANJE: ZAHVALNICA OPĆINE JAJCE DODJELJUJE SE POSTHUMNO NIJAZU DURANOVIĆU

Nijaz Duranović ima veliku zaslugu za povratak suživota u Jajce. Kao predsjedavajući Općinskog vijeća Jajce u dva mandata, periodu od 1998. do 2004. godine mnogo je doprinio povratku u prvim godinama obnove.

Rođen je 31. decembra 1958. godine u Divičanima, općina Jajce. Nakon završene mašinsko-tehničke škole u Jajcu, nastavlja školovanje na Pedagoškoj akademiji u Banja Luci, smijer matematika i fizika. Radio je kao nastavnik, pomoćnik direktora, a početkom agresije na BiH uključuje se u jedinice Terorijalne odbrane i daje veliki doprinos u odbrani Jajca gdje na linijama odbrane grada biva i ranjen. No bez obzira na sve ponovo se uključuje u odbranu domovine zajedno sa saborcima 305-705. Slavne brdske brigade. Bio je uposlenik u Odjeljenju odbrane, a potom u Službi Civilne zaštite općine Jajce.

Rahmetli Nijaz Duranović bio je šest godina predsjednik Medžlisa Islamske zajednice Jajce.

PRIZNANJE: ZAHVALNICA OPĆINE JAJCE DODJELJUJE SE POSTHUMNO MIDHATU KARADŽIĆU

Midhatu Karadžiću pripada posebno mjesto u istoriji Jajca. Na višestranačkim izborima 1990 godine prvi je demokratski izabrani predsjednik Skupštine opštine Jajce.

Rođen je 1939. godine u Sanici kod Ključa gdje je završio osnovno obrazovanje. Srednju školu i Tehnički fakultet mašinskog smijera završio je u Banja Luci i Ljubljani.

Organizator je pripreme otpora i odbrane grada, predsjednik Kriznog štaba i Ratnog predsjedništva općine Jajce. Nakon sedmomjesečnih žestokih odbrambenih borbi prinuđen je s borcima i narodom povući se u Zenicu, gdje već u novembru 1992. godine formira Ratno predsjedništvo u izbjeglištvu. Sredinom 1993. godine u Travniku preuzima dužnost zamjenika predsjednika Banjalučkog okruga, a potom učestvuje i u formiranju 7. Korpusa A R BiH.

U Jajce se vraća 2000. godine, gdje živi do smrti 2011. godine.

Teško je čestitati dobitnicima, jer ih nema među nama, ali čestitke upućujemo obiteljima nagrađenih s porukom da i se na ovaj način želi odati priznanje i sačuvati od zaborava naše Jajčane i prijatelje našeg grada koji su svojim djelima, radom i rezultatima ostavili trajni trag i zadužili nas da ih se sjećamo. Vi, njihova obitelj, s ponosom u srcu čuvajte uspomene na svoje najbliže.

Svečanost su svojim muzičkim izvedbama uveličali članovi Zbora Hrvatskog Kulturnog Društva „Napredak“ Jajce.

Povodom Dana općine, Općina Jajce u saradnji sa nezavisnim portalom Jajce Online izdala je godišnji Informativni bilten u kojem su objedinjene sve aktivnosti i projekti Općine Jajce u 2018. godini.



4. MEĐUNARODNI KOŠARKAŠKI KUP KRALJEVSKOG GRADA



Košarkaši OKK "Spars" Sarajevo pobjednici su 4. Međunarodnog košarkaškog KUP-a kraljevskog grada nakon što su u finalnom susretu pobijedili momčad „Budućnost Voli“ rezultatom 98:74. Ovom pobjedom Sparsi treći put da osvajaju ovaj turnir.

U utakmici za treće mjesto KK "Budućnost" iz Bijeljine svladali su Školu košarke "Dražen Petrović" Šibenik rezultatom 78: 68.

Za najkorisnijeg igrača turnira proglašen je Bodin Šaranović član "Budućnost Voli", dok je najbolji strijelac turnira igrač OKK "Spars" Harun Zrno koji je postigao ukupno 74 poena.

U tri dana koliko je turnir trajao odigrano je 16 utakmica i učestvovalo je preko 120 mladih talentovanih košarkaša Bosne i Hercegovine, Srbije, Hrvatske, Crne Gore, Mađarske.

Ovogodišnji učesnici KUP-a: KK "VODOPAD" Jajce, domaćin turnira, OKK "SPARS" Sarajevo, KK "CEDEVITA" Zagreb, prošlogodišnji osvajač kupa, KK "BUDUĆNOST VOLI" Podgorica, FKSE "SZEKSZARD" Mađarska, ŠK "DRAŽEN PETROVIĆ" Šibenik, KK "SAVA" Beograd i KK "BUDUĆNOST" Bijeljina, debitant na košarkaškom kupu.

Turnir je uspješno organizirao KK „Vodopad“ Jajce, a generalni pokrovitelj bila je Općina Jajce.

GRADOVI PARTNERI

PIACENZA - Italija <http://www.comune.piacenza.it/>

ALAÇATI – Turska

HALLSBERG – Švedska <http://www.hallsberg.se/>

OTTENSHEIM – Austrija <http://www.ottensheim.ooe.gv.at/system/web/default.aspx>

VIROVITICA – Hrvatska <http://www.virovitica.hr/>

ZENICA – BiH <http://www.zenica.ba/>

TOMISLAVGRAD BiH - <http://www.tomislavgrad.gov.ba>

SZEKSZARD - Mađarska - <http://szekszard.hu/>

KUTNÁ HORA - Češka - <http://www.kutnahora.cz/>

BILTEN OPĆINE JAJCE

Općina Jajce u saradnji s nezavisnim portalom Jajce Online priprema mjesečni Informativni bilten Općine Jajce koji ćete u elektronskoj formi moći prelistati svaki mjesec.

U Biltenu će biti sumirane mjesečne aktivnosti, tekstovi i fotografije koje ste možda preskočili pročitati, a zaslužuju Vašu pažnju.

Također, u Biltenu ćemo najaviti i događaje za naredni mjesec. Pred vama je petnaesto izdanje Informativnog biltena Općine Jajce.

